

REGIONAL NEWS

HEADLINES:-

1. Chief Minister Pu Lalduhoman vawiin khan Aizawlah Mizoram Health Systems Strengthening Project buatsaih Knowledge Exchange Health Conclave a hawng.
2. Mizoram First pawl chuan Aizawl khawpui Kulikawn atanga Zemabawk inkar a veng 24-ah, an zirchianna atanga a lan danin, an hriat theih chinah hnamdang dawr 122 a awm an ti.
3. Prime Minister Narendra Modia chaun India leh United States ten sumdawnnaa inremna thar chhinchhiahtlak tak an siam chu dawhthei taka indawrna vang a ni a ti.
4. Sawrkar laipuiin ruihhlo dona tura hma a lakna Nasha Mukh Bharat Abhiyaan chuan ramchhungah mipui vaibelchhe 25 chuang a thleng tawh.

<><><>

CM

Health & Family Welfare Department hnuaia Mizoram Health Systems Strengthening Project buatsaih Knowledge Exchange Health Conclave chu Chief Minister Pu Lalduhoman vawiin khan Aizawl Falkland ah a hawng.

Thusawiin Chief Minister chuan, Mizoram sorkar hian mipuite hriselna chu ram hmasawna zelna atana thil pawimawh tih a hriat avangin mipuite hriselna lamah nasa takin hma a la a ti a. India rama health care system tha ber pawl Mizoram Universal Health Care Scheme a duang chhuak a. Empanelled Hospital kaltlangin pawisa pek ngai lovin damlote chu enkawl an ni ti. Hriselna hmunhma enkawl nate nasa takin an thum tha a, district hospital te, CHC leh PHC te an thum tha a, heng hmalakna tam takte hi Mizoram Health Systems Strengthening Project kaltlanga thawh te an ni a ti.

Health Minister Pi Lalrinpuii pawhin thusawiin MHSSP kal tlang hian damdawiin leh Centre te an thum tha nasa a, khawl thar tam tak an lei a, tangkai taka an hman avangin India rama damdawiin tha certificate dawng thei pawh an awm phah nual a ni, a ti.

Mizoram Health Systems Strengthening Projects hi World Bank sum hmangin kum 2021 khan kalpui tan a ni a. Kum nga chung kalpui tur a nih angin kumin March thlaah hian a tawp tawh dawn a ni.

MHSSP Project Director Dr. Lily Chhakchhuak chuan an cheng vbc 280 Project neiin kumin January thlaah khan Project Development Objectives panga zinga pali chu an tihlawhtling fel a ti a, hmabak la awm te chu kumin March thla ral hmaa hlen vek an inbeisei a ti. An hmalak zinga langsar ber pakhat chu March 2025 a Mizoram Universal Health Care Scheme tlangzarh kha a nih thu a sawi a. MUHCS hnuaia enrolment target hi zaa sawmkua leh pakhat an tihlawhtling a ti.

Ni hnih awh tur tawnhriat inhrihtawna -knowledge exchange conclave hmang tur hian ramchhung state hrang hrang; Telanagana, Meghalaya, Nagaland, West bengal, Assam, Tamil Nadu, Gujarat, Sikkim, Arunachal pradesh aiawh mithiamte bakah Gates foundation leh NEC aiawhte an tel a ni.

PWD MINISTER

PWD Minister Pu Vanlalhlana chuan, ram hmasawnna hnathawh leh environment humhalh chu inkhuangrual tak leh fimkhur taka kalpui a ngai a ti.

He thu hi vawiina Department of Environmental Science, Pachhunga University College leh Society of Agro Environmental Sustainability, Dehradun Uttarakhand ten a ni hnih chhung awh tur International Conference PUC Seminar Hall-a an buatsaihah sawiin, PWD Minister chuan, ram hmasawnna hna thawk tak tak tur chuan kawng laih te, in lian tak takte leh infrastructure hrang hrangte din a ngai a a, chutiang ti tur chuan ram ngaw, thing leh mau ten an tawrh chang a awm fo thin a ti a, hun lo awm leh zel turah pawh inkhuangrual taka development leh environmental conservation te kalpui a nih zel theih nan, zirlaite leh hemi lam kawnga research ti tute chu nasa lehzuala zirbingna kalpui tura chahin, an thiamna leh theihnate ram tana hmang tur leh sawrkar thawhpuitu ni turin a sawm a, vawiina International Conference-an hman pawh hlawk taka hmang theuh turin duhsakna a hlan nghal bawk a ni.

He huna thusawitu dang, khual zahawm Higher and Technical Education Minister Dr. Vanlalhlana pawhin thusawiin, tu chhuante chauh ni lo, chhuan lo la awm lehzel turte tana chenna tlak, ram nuam leh hrisel nei turin zirlaite leh hmasawnna hna duangtu te chu tangrual a, uar lehzual a zirbingna kalpui deuh deuh a ngaih thu a sawi.

<><><>

MIZORAM FIRST

Mizoram First pawl chuan Aizawl khawpui Kulikawn atanga Zemabawb inkar a veng 24-ah, an zirchianna atanga a lan danin, an hriat theih chinah hnamdang dawr 122 a awm an ti.

He thu hi vawiin khan Aizawl Press Club-ah chanchinbu mite hmaah Mizoram First pawlte hian an sawi a, he'ng dawr an tarlan tak zinga za a 76 point 2, mi 342 chu a nghaktu hnam dang an nih thu te, za a 34-te chu ILP neilo an nih bakah he'ng mite hi Assam leh Bihar atanga lo kal an tam ber thu an sawi a. Aizawl a hnam dang dawr an hriat zingah za a 39 point 3 te chauhvin GST an pek thu te, in sakna bungraw zawrhna bakah, Mizoram nitin mamawh eichawp thil a hlawm a pekchhuahna tam zawk chu hnam dang kutah a awm deuh vek tawh thu an sawi.

Mizoram First pawlte chuan ILP vil leh chhui zuina Real Time Visitor Tracking-te, Sumdawna Chhinchhiahna Digital Business Mapping bakah Chhiah Pek Vilna Automated Compliance-te chu neih a tul tawh hle tih an sawi a. Hnam dang huat vang leh thik vang ni lovin, Mizo hnam a him theih zawkna atan hemi kawng a hmalatu tur ni a an hriat, Home Department, Information & Communication Technology, Tourism leh Taxation Department changtu Minister te bakah Chief Minister bualh pawh he thu hi an thlen tawh thu an sawi bawb.

<><><>

CS

Chief Secy Pu Khilli Ram Meena hovin State Level Empowered Committee (SLEC) vawiina Aizawla thukhawm chuan Sansaad Adarsh Gram Yojana (SAGY) hnuaia project la zawh loh 80 paih an rel.

SAGY hi thingtlang khuate tihhmasawnna tura October 2014 atanga India sawrkar laipuiin a kalpui tan a ni a. He scheme hnuaiah hian Member of Parliament (MP)-te'n thingtlang khua an thlanchhuaha hmasawnna ruhrel huap zau tak – khawtlang tan, hnam tan leh ram hausakna tihchangtlun nan mawhphurhna an la a. Kum 2016 thleng khan MP tinin Gram Panchayat pakhat a thlang a, khaw entawntlak (model village)-ah a chhuah a. kum 2019 thleng khan MP tinin khaw pahni dang an enkawl leh a, kum 2024 thlengin kumtin khaw pakhat an enkawl bawk a ni.

Hemi hnuaiah hian Village Development Plan siamin project 816 a awm a, heng zinga 736-te chu hlawhtling taka zawh a ni tawh a. A tirah chuan kum 2024 hma ngeia project zawng zawng zawh tum a ni a. Amaherawhchu, hemi hun chhung hian harsatna hrang hrang avangin project thenkhat chu zawh theih a ni ta lo a. Heng zinga project thenkhat chu Ministry of Rural Development, SAGY Division chuan August ni 7, 2023 khan SAGY portal-a VDP hnuaia project paih phalna a pe a, Ministry-in July ni 31, 2025 hmaa SAGY hnuaia project-te zo fel tura thu a pek zawmin Mizoram chuan SAGY hmalaknate kim tak leh hlawhtling takin a khar thei dawn a ni.

<><><>

LESDE FEST

Labour, Employment, Skill Development and Entrepreneurship Minister Pu Lalnghinglova Hmar chuan, kar leh February ni 10 atanga ni 14 inkar a LESDE Kut buatsaih tur anih thu sawiin mahni kut kawih thiamna hmanga eizawngtute bakah, sorkar laipui leh Mizoram sorkar hnuai a agency te inkara remchanna siam sakna hun tangkai tak a nih a beisei thu a sawi.

He thu hi vawiina chanchinbumite hmaah a sawi a. LESDE Kut chuan tum tam tak a neih thu leh he'ng zingah hian Mizoram tualchhung a thil chi hrang hrang siamchhuahte chu a hralhna lamah huang a zauh pui ngei a beisei thu te, thalai hna la hmu mai lo thiam thil nei tha tak takte tan ram pawn lama hnathawh tur inkawhhmuhna hun a nih tur thu te a sawi a. Hei bakah hian State Level Special Vendor Development Programme an buatsaih tur thu a sawi a, hemi atan hian National Highways & Infrastructure Corporation Limited (NHIDCL) bakah Power Grid Corporation, Indian Oil Corporation Limited, Food Corporation of india, North Eastern Eletrical Power Corporation Limited (NEEPCO) leh North East Frontier Railway (NFR) te an tel tur thu a sawi bawk.

Pu Lalnghinglova Hmar chuan Labour Kut lo awm tur pual hian MBOCWWB hnuaia inziaklut te tan eizawnnna kailawn an tih mai skill training & entrepreneurship support bakah “rahbi chhertu” ti a a hming an vuah, a thlawna coaching inpekna hun chu hawn a nih tel tur thu a sawi bawk.

<><><>

CM-COOPERATIVE

Vawiin khan Chief Minister Pu Lalduhoma chuan a office-ah Registrar of Cooperative Societies Computerisation a hawng.

Chief Minister chuan Digital service lama India rama hmahruaitu nih an duh a ti a. Hma pawh an la nasa a, kum hnih chhung hian Online Service portal hi 20 aia tam kan siam tawhin a rinawm a ti.

Cooperation Minister Pu PC Vanlalruata pawhin thusawiin, he hmalaknaah hian India rama a thawk zo hmasa ber dawttu an ni a, Mizorama a puma office computerise hmasa ber an nih an inring bawk a, an chhuang hle a ti.

He project-in a tum ber chu cooperative society-te tana an hna thawhna kawnga samkhaina siamsak leh cooperative society-ten a hmuna office dawr kher ngai lova digital-a RCS office leh district hrang hranga cooperative office-te nena an indawr tawn theihna tur a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

AIHM 2026

Sports Minister Pu Lalnghinglova Hmar chuan, kumin 2026 Aizawl International Half Marathon neih tur chu, kum hmasa lam ai a ropui zawk a buatsaih tum a nih thu leh, Mizoram chawi lartu a nih ngei a beisei thu a sawi.

Vawiina a pisa a chanchinbu mite a kawmnaah, he thu hi Sports Minister chuan sawiin, Aizawl International Half Marathon chu inelna a nih piah lamah, Mizoram tlawhtute tan thil hriat reng tur pakhat, Mizoram mawina leh Mizote nunphung pho chhuahna remchang a nih thu a sawi a, kumin 2026 Tourism Event Calendar-ah pawh an telh thu a sawi bawk. Minister chuan kumin 2026 Aizawl International Half Marathon chu karleh inrinni February ni 14-ah Rajiv Gandhi Stadium Mualpui atanga vai liam tur a nih thu te, Sairang thleng rel a lo luh tawh avangin, kum hmasa lam ai a a chhimtu pawh an tam an beisei thu a sawi a, AIHM 2026 atan hian mi zawng zawng tel tura an sawm bakah, Africa khawmual ram thenkhat atang pawhin a chhimtu tur ten visa an tihfel tawh thu a sawi bawk.

Kumin Aizawl International Half Marathon atan hian lawmman siam a ni a, Mipa leh Hmeichhia Kilometer 21.1 a thui tlan zinga pakhatna in sum fai cheng nuai 2, pahnihna in cheng nuai 1 sing 5, pathumna in cheng sing 7 sang 5, palina in cheng sing 2 sang 5 bakah, panga na in cheng sing 1 sang 5 an dawng dawn a, hei bakah hian kilometer 10 a thui mipa leh hmeichhia tlante zingah lawmman pakhatna cheng sing 7 sang 5, pahnihna cheng sing 5, pathumna leh palina cheng sing 1 sang 5 bakah panga na in cheng sing 1 an dawng bawk tura tih a ni.

<><><>

INDIA-US TRADE

Prime Minister Narendra Modia chaun India leh United States ten sumdawnnaa inremna thar chhinchhiahtlak tak an siam chu dawhthei taka indawrna vang a ni a ti. Vawiina NDA Parliamentary party inhmuhkhawmah NDA MP te hmaah he thu hi sawiin Pu Modia chuan US nena inremna thar chuan eibar zawinnaah boruak tha zawk a siam tihi sawiin sawrkarin khawvel insumdawntawanna kawngah sawrkarin kalphung nghet leh awmze nei a kalpui tih a tarlang a ti bawk.

Puan tawh angina Prime Minister Narendra Modia leh US President Donald Trump te an inbiak hnuah ram pahnih sumdawnnna lama inremna thar siam puitlin a ni a. Social Media lamah he thu hi puangin Pu Modia chuan India thilsiam US-a thawnlukah te chiah tihhniam niin tariff zaa 18 lak a ni tawh dawn a ti bawk.

Union Ministers Amit Shah, Dr S Jaishankar, Rajnath Singh, Ashwini Vaishnaw, Piyush Goyal, Kiren Rijiju, Nitin Gadkari, JP Nadda leh Annapurna Devi te chuan inremna thar an siam theih avangin Prime Minister Narendra Modi leh US President Donald Trump te bakah India leh US mipuite an lawmpui thu social media lamah an tarlang a ni.

<><><>

NMBA

Sawrkar laipuiin ruihhlo dona tura hma a lakna Nasha Mukh Bharat Abhiyaan chuan ramchhungah mipui vaibelchhe 25 chuang a thleng tawh. Union Social Justice and Empowerment Minister Virendra Kumar chuan Lok Sabha-ah ziaka zawhna chhangin ramchhungah thalaiten ruihhlo thatloh zia an hriat theih nan inhrilhdarhna beipui he programme hnuaiah hian neih a ni a ti a. Pu Kumar-a chuan kawng hrang hrang hmalak anih thu sawiin thalaite zingah ruihhlo hmansualna hluar chho mek do turin theihtawp an chhuah tih a sawi a ni.

<><><>

BUDGET

Federation of India Chambers of Commerce and Industry (FICCI) President Antant Goenka chuan Union Budget 2026-27 chuan khawvel sum dinhmun chianglo tak karah policy felfai tak, insiamthatna kalpui chhunzawmna leh eizawnnna tenaute tana insawhnghehna tur a thlen dawn a ti. Vawiina FICCI in Union Budget 2026-27 sawihona an buatsaihah he thu hi sawiin sawrkarin leiba titem tura hma a lakna leh hmasawnnna tura sawrkarin sum tam zawk hman tura a rel chu lawmawm a tih thu a sawi bawk a ni.

<><><>